

>>Generasi muda pula perlu dididik mensyukuri nikmat yang diwariskan kepada mereka dan memikul amanah mempertahankan kemerdekaan dan kedaulatan negara



Kenang pengorbanan wira negara



Noor
Mohammad
Sadiq
Haneed

Kemerdekaan dan kebebasan yang kita nikmati selama ini hasil pengorbanan besar pahlawan dan perajurit negara dalam mempertahankan keamanan dan kedaulatan tanah air tercinta ini.

Hakikatnya mana mungkin kita merasai detik bersejarah mencapai kebebasan daripada penjajah andai tiada peranan penting daripada pahlawan negara yang kemas terpahat dalam lipatan sejarah negara ini.

Bagi memperingati jasa, sumbangan dan pengorbanan perwira negara, kita menyambut Hari Pahlawan setiap 31 Julai sejak 31 Julai 1960. Peristiwa hari itu dibuat Perdana Menteri pertama Malaysia Almarhum Tunku Abdul Rahman Putra

Al-Haj sebagai memperingati jasa pasukan keselamatan negara membabitkan polis serta tentera.

Ini sempena tamatnya era darurat yang menjadi landasan untuk kita mensyukuri keamanan yang dikecap sekarang.

Itu juga memberi ruang serta peluang kepada rakyat, terutama generasi pasca merdeka untuk mengimbau kembali detik hitam bumi tercinta ini dijah oleh pihak luar di samping memperingati dan menghargai perjuangan pahlawan negara terdahulu mahupun pada hari ini dalam mempertahankan kedaulatan dan keamanan negara.

Pada tahun ini sambutan Hari Pahlawan diadakan dengan penuh istiadat di Dataran Pahlawan, Putrajaya. Walaupun setiap tahun kita menyambut Hari Pahlawan, namun persoalananya adalah ia sekadar sambutan istiadat semata-mata serta berapa ramai generasi muda mempedulikan dan mengambil tahu adanya

sambutan ini mahupun menghargai sumbangan pahlawan negara.

Ironinya tahap sensitiviti dan kepedulian golongan muda terhadap sambutan Hari Pahlawan boleh dikatakan masih rendah dan mengecewakan. Hal ini kerana penglibatan orang muda menjaya dan meraikan sambutan Hari Pahlawan jelas tidak kelihatan dengan ketara. Saban tahun hanya pasukan keselamatan serta barisan veteran anggota keselamatan yang bersungguh-sungguh

menjayakan sambutan Hari Pahlawan manakala generasi yang lahir selepas penjajahan seolah-olah langsung tidak mempedulikannya. Ini ditambah pula sumbangan orang awam mahupun sektor korporat kepada dana Tabung Pahlawan juga dilaporkan agak kurang memberangsangkan.

Jelas mood dan semangat yang diharapkan membawa melalui sambutan Hari Pahlawan ini belum mencapai tahap kemuncak

yang diidamkan oleh kita semua. Apa yang pasti situasi ini cukup menyediakan kerana kita tidak mahu generasi muda melupakan segala jasa dan pengorbanan wira negara baik yang dulu mahupun yang sekarang yang secara berterusan menggadai nyawa mempertahankan kedaulatan dan keamanan negara.

Masyarakat seharusnya lebih prihatin dan menghargai jasa wira negara kerana tanpa mereka kita tidak akan terus kekal selamat dan aman seperti sekarang. Walaupun secara berterusan kita dihujani pelbagai ancaman dan dugaan sejak dijah hingga sekarang, namun apakah kita masih tidak sedar betapa negara kita jauh lebih aman dan stabil berbanding negara luar yang sering bergolak.

Dari zaman komunis, Jepun, British hingga ke ancaman kumpulan militan seperti Daish sekarang pasukan keselamatan negara terus memainkan peranan penting dengan penuh

bertanggungjawab agar rakyat dan negara sentiasa kekal selamat, aman dan stabil. Untuk itu kita perlu menzahirkan rasa syukur dan terima kasih kepada pahlawan kita.

Justeru penulis berharap kita tidak terhenti setakat menyambut Hari Pahlawan semata-mata. Kita tidak mahu ia menjadi sekadar sambutan istiadat pada satu hari tertentu dan kemudian kita melupakannya sehingga sambutan pada tahun berikutnya. Sepatutnya penghayatan terhadap pengorbanan dan jasa pahlawan perlu dihayati dan dirasai sepanjang masa. Hal ini ketara hanya dengan cara itu generasi hari ini akan menghargai keamanan, kebebasan dan kestabilan yang sedang kita nikmati sekarang.

Maka kita berharap usaha dan inisiatif untuk menyedarkan golongan muda tentang keperluan untuk menghayati sejarah perjuangan perajurit negara perlu terus dipergiatkan

melalui pelbagai kaedah dan pendekatan. Ia juga perlu merangkumi pelbagai peringkat golongan masyarakat seperti pelajar sekolah, mahasiswa serta golongan dewasa generasi pasca merdeka yang tidak merasai detik hitam negara ini dijah oleh kuasa asing.

Di samping memberi penekanan sewajarnya terhadap pengajaran subjek sejarah dan kenegaraan baik di peringkat sekolah mahupun universiti, kita juga perlu berusaha untuk lebih kreatif agar penerokaan dan penceritaan kisah silam tentang sejarah negara ini boleh diterima dan dihayati dengan baik tanpa membosankan. Hal ini penting kerana rata-rata pelajar sekolah terutamanya akan berasa bosan jika sekadar baca dan hafal fakta melalui buku sejarah itupun sekadar hanya untuk tujuan lulus peperiksaan.

Antara cara yang boleh memberi kesan yang langsung ialah melalui penceritaan dalam drama

PENTOMIN serangan hendak komunis pada tragedi di Gerik 1977 di peringkat sambutan Hari Pahlawan.

dan juga filem yang boleh menarik minat serta mencetuskan tahap kesedaran dalam kalangan generasi muda. Penulis masih ingat filem seperti *Bukit Kepong* dan *Leftenan Adnan* antara usaha murni wajar dipuji kerana meninggalkan kesan dan impak yang cukup mendalam dalam hati dan sanubari setiap penonton. Kita wajar menghasilkan lebih banyak lagi filem sejarah seperti ini dengan gaya kreativiti yang lebih menarik supaya dapat menyentuh hati dan perasaan penonton muda.

Kesimpulannya semua pihak perlu sedar betapa sambutan Hari Pahlawan bukanlah sekadar sambutan yang biasa.

Generasi muda pula perlu dididik supaya mensyukuri segala nikmat yang diwariskan kepada mereka dan sama-sama memikul amanah serta tanggungjawab untuk mempertahankan kemerdekaan dan kedaulatan negara kita. Terima kasih pahlawan negara!

Penulis Ketua Bahagian Hal Ehwal Pelajar UPM